


# Jawunany



The Book of Jonah in the Kitja language of Australia

## Jawunany

### The Book of Jonah in the Kitja language of Australia

copyright © 1978 Bible Society of Australia

Language: Kitja

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-05-23

---

PDF generated using Haiola and XeLaTeX on 11 Nov 2022 from source files dated 30 Nov 2021  
b6557891-c9d9-5c64-9358-eeb9cdae76ae

## Contents

Jonah . . . . .	1
-----------------	---

## Jawunany

ISBN 0 647 13030 0 590P © B.S.A. 1978 330 copies

Perrem jarrikpe Jawunany nu. Tany Juwiji ngininiyiin. Taawany nginimanji tan taan, yinginpe pirri Yijirayilpe. Tany Jawunany Ngapuny nu warrkamkaliny, yinginpe ningi Purapitji. Tany purapitji winji winji Ngapuny nungu. Ngapuny perra penayitji tam purapitpe jarakkirrim tam jarrikpe nuwa. Jarrikpe Ngapuny nuwa jarrak perrani pirri waringarrim.

Ngapuny perra nginiyitji Jawunany Ninipayurrung. Perra nginiyitji pirri tam waringarrim perraniyiin ngarri tan taan yinginpe pirri Ninipan. Tam waringarrim purru taam perraniyiin ngirripawurrung ngela. Jawunany nu nawuyangem taam perraniyiin kilirripiny.

Tany Jawunany ju nawuyangem ningkuwum nguwan warta pempermangpe tam yakengirrem taawany purrunpu ngarri tan nawarran mayarun Ninipan. Tam Ninipangarnam nguwan tawung ngurramangpe Ngapuny. Yakepam. Wayinikana tany Jawunany nguwan nguiwyin pirri tam yakengirram. Nguwan warta penamanji tam ngulmurru, perraniyiin ngarri Ninipan.

Nginginirriyin, "Tam ngulmurru rangkawanji pimpirrijpe perrem jarrikpe Ngapuny nuwa. Rangka ngarri pimpirrijpe, turlanji pirriyan Ngapuny ningi, Ngapuny kungkulumpi kunaka ngiyiwuwun. Kunung nguwin purru. Nguwan pinpiji. Kat ngarri pimpirriwurrupe tam yilkurrum panji ngarri pemerremenpe, tawung ngarri ngurrimpe Ngapuny, tawurayik pinpiji. Nguwan kirrij pinpiji." Wayinijam nginginirriyin. Perrengempe wijiwu nginiyin kilirriku. Nguwan nguiwyin ngela Ninipayurrung.

Ngapunykany Jawunany pinarrik nginiyitji nawuyanginy nu. Ngapuny tawung penemenji waringarrim. Tawung ngarri penemenji ngulmurru, kauwayinija rangka ngarri ngurremenpe Ngapuny, yilkurrungem kunak ngarri purruwanpe nungu, tawung ngarri ngurremenpe Ngapuny tawurayik pinpiji, mullya pinpemuluwunji. Warany. Wayini Ngapuny pinarrik nginiyitji nawuyangim nu.

### *Jawunany nguwan rangka nginimanji Ngapuny*

<sup>1</sup> Jirrawukuwalun Ngapuny nginini ni Jawunany. Tany Jawunany wilikany nu Yamitayiny. <sup>2</sup> Ngapuny nginini ni Jawunany, "Piyarra ngela Ninipayurrung. Ngela piyarra pirri tam waringarrim, purrunpu ngarri tan nawarran mayarun Ninipan. Pawu pene pirri, 'Kelewirring Ngapuny tek nenemenjini yilkurrum panji panji ngarri jamperremene.' Pene pirri, 'Kat pampurruwurrupta tam yilkurrum. Tawung parramma Ngapuny.'"

<sup>3</sup> Purrungunti Jawunanykany nguwan rangka nginanyji Ngapuny. Kilirr wijiwu nginiyin. Wijiwu nginiyinte kilirriku ngirripawurrunkili. Yulu nginiyin Japayurrung. Tam jarrikpe Ngapuny nuwa kat penawurrutji partun. Purap ngarri nginiyin Japayurrung, ketpa nyaniyitji yawinyili. Yawinyili kurrgangarnal that nyaniyinyante kurrrgan. Kilirr marran kirrip ngarri nyaniyinya ngirripawurrung Payinyurrung. Ngarrkalem waj ngarri penayitji ni tany nawarrany majany yawinyil nguyu, Jawunanykany milimilima penamanji nuwa. Purrungunti pirtij nginiyin pirri tam warrkemkalim yawinyil nguyu. Walika nginiwatji yawinyil ngiyi. Pakuwa ngininiyiin yilikin.

<sup>4</sup> Purrungunti tal yawinyili nginanyawa pelekewirrin kurrrgan. Nyaniyinya ngarri nawarryurrung kurrrgan, walangapam Ngapuny perrawa penayitji. Walanginy kernkalepny kurrrgan pelekewirrin tana

waranganpe penayitji. Waranganpe nyaniyitji tal yawinyil. Marran kapert kirrip nyaniniyinya yawinyil.

<sup>5</sup> Perrengempi tam warrkemkalim yawinyil kurrngangarnal nguyu jilpa perrani. Maakemaake perrani. Niniyit perrani walangam purru. Pawu perrani pirri purriyangem kutpe. Jirrawukuj pawu perrani pirri kutpe. Yakapam. Nguwan. Tam walangim nawarraya kere wumperramante. Perrangirriyinpe, "Pulpam werrkep kala yarren. Wayinikanji muliyayanji yarrinya." Perrangirriyinpe. Tangempi pulpam werrk wumperrama. Warany. Wayinikanti tany Jawunany pakuwa ngininiyinte yilkin yawinyin. Muyum paku ngininiyinte.

<sup>6</sup> Tangempi tany nawarrayn ngarayi ngininiyitji, paku ngarri ngininiyinte yilkin. "Kapuwa nene?" wanamayi ni. "Kelengenti turrawu purru paku ninante? Pirtij pene. Pawu pene ni Ngapuny ngu. Rangkawanji yinpijiyyurru. Mulurruwanyji nguwin yuru. Wanjiyayanyji yarrinya. Muliwayanji yarrinya," nginini ni Jawunany.

<sup>7</sup> Purrungunti tam warrkemkalim perrangirriyin, "Ngarrkalijam wehetji kala yarrin. Ketpawanji yarrinya tany, rerr ngarri penamanjiyurru perrem warim," perrangirriyin. Tangempi ngarrkalajam wehetji perrani. Ketpawa ngurrayitpe nu yinginpe Jawunany nu. Perrangirriyin, "Ngingiyanja maruwunyi." <sup>8</sup> Tangempi perrani ni, "Nyingiyanji maruwunte ngu. Nyingyan ma rerr junamana yarre perrem warim? Kapuwa nene ngenke? Kayimilina ngu? Kayipinya nanina? Taampi kawurra ngu? Kawuya ngu waringarrim?" perrani ni.

<sup>9</sup> Purrungunti nginini pirri, "Ngayanti Juwujin nga. Ngapuny tamalarrk nemenke kelewirriny, Ngapuny ngarak ngarri penamanji taam ju perrem kurrngam." <sup>10</sup> Tangempi nginini pirri, "Wijiwu ngenatke nuwa Ngapuny." Nginini ngarri pirri, niniyitke nyaliny penamanji tam warrkemkalim. Miyangki ngurrayangpe, "Turra purru wiji wu nanina nuwa Ngapuny?" perrani ningi. <sup>11</sup> Purrungunti tam warrkemkalim perrani ningi tany Jawunany, "Waranya. Kapa yarren ningki. Perrempai walangampi jangpe yimperrewarrenpe yurru. Kapuwa yurrun ningki, wirka ngiruwun kernkaliny. Kernkaliny nawarrayn nyaliny nginiyin. Nguwan wirrk nguiwyin," perrani ningi.

<sup>12</sup> Perrengempi Jawunany nginini pirri, "Miyawa jarrawat yimpirimna, wehet kala yimpirrij. Kurrngan wehet kala yimpirrij. Kurrngan wehet ngarri yimpirrijta, warany, walanginy kirrij nguyayi nungkurru. Wirka ngiyayi. Ngayana ngarnpe warimpe nunanyke. Nawarrayn walanginy ngayana kuj nanayana nungkurru," nginini pirri. <sup>13</sup> Perrangirriyin, "Kulangkiny. Mulurru yirran nungu." Warany. Kernkaliny nawarrayayi. Nguwanganan. Tany katakatawuya jurra ngarri nginini yawinyil. Nguwan. Purrukaliny. Ngirrijipiny, piyirripipiny jurra ngarri perrani. Nguwana. Purru karri wurrul partun piriwu nyananyji kernkaliny. Mengerr nyimperranype. Nguwan nyaniyinya palawayurrun. Purrukaliny kernkaliny. Nguwan.

<sup>14</sup> Purrungunti pawu perrani ningi Ngapuny kuluwurr, "Nguwan kuj yinpijta yarre nginjiny nungu. Nguwan marup yinpiyajta yarre, wehet ngarri yirriji. Nguwan warim karij yinpinma yirri, kurrngan nguwinji ngarri, nang ngarri nguwinji. Nguwan thet yinpijta yarre nginjiny jiyiliny nuwa. Nyingiyana perra junayita yirri perrem warim," perrani ningi Ngapuny. <sup>15</sup> Tangempi Jawunany tany jarrawat ngurramangpe. Wehet ngarri ngurrayitpe kurrngan, wirrk perryin. Walanginy wirrk nginiyin. Nguwan kere purruni kernkalim. Nguwanganany. Kirrij waniyitji.

<sup>16</sup> Perrengempi walanginy wirrk ngarri nginiwatji, tam warrkemkalim

tamalarrk ngurramangpe Ngapuny. Pinarri perraniyiin nungu. Linga linga perrani walanginy nuwa. Tamalarrk ngurramangpe Ngapuny. Waranya. Miyalawa wirrjip pumperrayitpe nungu. Papij pemperrayangpe nungu. Wayinikana kulurruku tamalarrk ngurramangpe Ngapuny. Wankim lutarayi perrani kulurruku. Perrani ningi, "Tamalarrk yirremenjingungu Ngapuny. Pinarri yirranjingu. Nawarran ngu. Yirranyji ningki. Tamalarrk yirrimnyi ngungu jimurrawukja Ngapuny," perrani ningi.

<sup>17</sup> Warany kurrgam jangpe ngarri ngurranype tany Jawunany, Ngapuny perra nyananyji tal kuntarril nawarral. Ngelthek nginiyitja. Kuntarril namul nginiyanya tany Jawunany. Yilakayi kumutuk nginimuluwatja. Kalarun nginimuluwatja yilikin. Waranya merrke merrken wananya taampi ngininiyinte. Jaayany ngininiyinte ngiyi merrkenpam taam yilikeyan ngiyi.

## 2

### *Jawunany yangki nginimanji Ngapuny*

<sup>1</sup> Purrunngunti yilikipiny kuntarril ngiyi kalarun, Jawunany tamalarrk nginimanji Ngapuny kuluwurr. Kalarupiny ngininiyiin ngarri yilikin ngiyi kuntarril, jarrauk nginini ni Ngapuny.

<sup>2</sup> Nginini ni, "Tamalarrk nemenangu Ngapuny. Ngakinymilim warim ni namuluwatke ngarri, yangki nanamanangu. Yangki ngarri nanamanangu, rangka yinanyna. Yinamuluwata. Kalarupiny, yilikipiny nang kirrip ngarri ngenaniyiin, katakatawuya yangki nanamanangu muliyakirrim. Ngapuny rangka yinanyna. Tamalarrk nemenangu Ngapuny.

<sup>3</sup> "Wethet ngarri yinayita yilak kalaruyurrung, yilangaku thutpu nge-nawatke. Kurrgany namul nginayitji. Marran ngaminayiwu nge-nani. Ngalukujpany ngenayanyji. <sup>4</sup> Jarrauk nyaliny ngenan ningki Ngapuny. Ngenangirriyin, 'Yilwarriya marra nginpalyante. Jimurrawukja kat nuwurutke taan ninante ngarri.' Ngenangirriyin, 'Nguwan tek nyaliny nunpimke tam mayarum purrutpu ngarri tamalarrkirrim, ngalany ngarri purrun ngungu,' ngenangirriyin.

<sup>5</sup> "Ngenan ningki Ngapuny. Kurrgam yirringulku nunangunke. Laanepiny kurrgam ngapari ngapari perrani ngirri. Kempe ngemperramangpe. Yilikin ngenaniyiin ngarri kalarun, wirrmilimjarn merewam wer-kale kurrgangarnam mernmertpe ngemperramangpe tumun. <sup>6</sup> Yilak thutpe ngenawatke kumutuk kalaruyurrung. Tayurrung thut ngenayinte nangem purrunpu ngarri, thep ngarri purrunpu jimurrawukja. Nguwan. Nyingan ngakinyji Ngapuny piri yinanyna yilangpiny. Piri yinanyna muliwaya. Ngenan ningki Ngapuny.

<sup>7</sup> "Ngenangirriyin ngarri, 'Nang kirripta ngenanke,' Yangki nanamanangu. Kelewirringpiny rangka yinanyna. Nyingepiny taam kuluwurr niante ngarri, rangka yinanyna, ngenan ningki Ngapuny.

<sup>8</sup> "Tam waringarrim yakapaya purrun ngarri, tamalarrk ngarri pem-perramanpe yakengirram kutpe, marran kat nemperrawurruta purru.

<sup>9</sup> Ngayana tamalarrk nimpimnangu. Jaampirri ngalany nginpin ningki. Tuwayina waj nunpijke ningki tamalarrkirrim. Tam jarrauke welangen ngenani ngarri ningki, 'Tawung nimpimnangu, Nguwan kat nimpuwur-rutangu.' Warany. Kelyengengem tawung nimpimna. Nguwan kat nimpuwurutangu. Yijiyan ngenan ningki. Ngapuny yilkurrungem rerrwu ngenemenji. Nawunkany miluwaya ngenamuluwunji." Jawunany nginini ningi Ngapuny. Maarrke kuntarril nginimuluwatjante yilikin jaan.

<sup>10</sup> Purrungunti Ngapuny jarrak nyaniyiti tal kuntarril. “Palawayurrung piyita. Yulak piyita palawan,” nginini ngiyi. Tangempi tal kuntarril nginanya. Yulak nginiyitja palawan. Warany.

### 3

#### *Jawunany rangka nginimanji Ngapuny*

<sup>1</sup> Purrungunti Ngapuny partupartu nginini nyaliny ningi Jawunany. <sup>2</sup> Ngapuny nginini ni, “Ngela piyarra Ninipayurrung, tam nawarran mayarum. Piyarra pirri. Pawu pane pirri tam waringarrim. Pena pirri perrem thuwanthum wajpe nunayitke ningki,” nginini ni. <sup>3</sup> Tany Jawunany rangka nginanyji Ngapuny. Warangkanya marran nginiyin ngela Ninipayurrung. Tam nawarram mayarum. Jarraka ngarri wumpiji pirri, merrka merrkan wumpiyayiji pirri. <sup>4</sup> Tangempi purap ngarri nginiyin mayaruyurrung, Kili wananyintje. Kilili wanamayintje karrarukpu wanina ningi. Makane purakpuwa nginimiyinji pirri. Pawu nginini pirri, “Jirrawukuwalun karnkinywalun Ngapuny kulpurr pinpiji. Perrempi Ninipam kirrij nanopijiningi waringarriny narruna ngarriya,” nginini pirri.

<sup>5</sup> Purrungunti rangka ngurranyype tam jarraakpe Ngapuny nunguwa. Rangka ngurranyype thuwanthum pawu ngarri nginini pirri Jawunany. Perrangirriyin, “Yurrun nguwan jang yarrin. Waringarrim nawarram ju wanyanyakim nguwan jang yarrin miyale mayim thuwuthum. Taj yampirrija jingkerrkerr karrakim. Waranya. Nguwan jang perrani. Jingkerrkerr karrakim taj pemperrayangpe. Nguwan menkawum taj pemperrayangpe. Mulurruk perrangirriyinpe. Wayinikana turi perrawuwuranpe,” perrangirriyin.

<sup>6</sup> Tany nawarrany kingji waringarrim purru purrunpe ngarri Ninipan, rangka penanyji jarraakpe nuwa. Rangka ngarri penanyji, laanepiny thut nginiwatji. Nawuyangepin mayarun rut ngininiyinte ngarri thut nginiwatji. Pelak penayanyji tam junayinkarram lalajkirrim lalaj ngarri nginiliyinji. Taj penayanyji tam jingkerrkerr karrakim. Nginiyin. Kawune ruta nginiwatji. <sup>7</sup> Tangempi tany kingji perrem jarraakpe perra penayitji pirri waringarrim. Jarraak nginini pirri, “Perrem jarraakpe ngayan perra nuniyinke narri. Ngayan ju ngakinype manamparram yarrekili yirran narri, Nguwan jang narrin thuwuthum. Nguwan nguluk narrin kurrngam. Nyingiyangem pulumanam ju kukanjam nguwan jang pirrin. Nguwan nguluk pirrin. <sup>8</sup> Ningkirriwan taj narrayiliyina jingkerrkerr karrakim pirri. Nyingiyangem yanamulpe taj pamparrajta pirri jingkerrkerr karrakim. Katakatawuuya jarraak parru ningi Ngapuny. Tamalarrk parramna Ngapuny. Tam yilkurrum panji ngarri narrun, kat pamparrewurrupta yilkurrum tam. Kunak parruwuna. <sup>9</sup> Ngapuny kungkulum turlwanji nguwiayiyu. Kunakanyji nguwiyi. Nguwan warim pinpijiyyurru. Mulurruwanji nguwan yurru jaan. Nguwana nang yarruwun, muliyawanji yarrinya,” tany kingji nginini pirri.

<sup>10</sup> Purrungunti rangkawa pemperranyype tam jarraakpe tam waringarrim. Kat pemperrawurrupte tam yilkurrum, panji ngarri perrani. Kata pemperrawurrupte. Tamalarrk ngurramangpe Ngapuny. Tangempi Ngapuny tek penamanjinte. Nginingirriyin, “Perrempi waringarrim kunak perrawuwuranpe.” Ngapuny kungkulum turl nginiwuranji. Nguwan thet penayitji kuma nginini ngarri pirri.

### 4

#### *Jawunany warinykuwa nginimiyinji*

<sup>1</sup> Purrungunti Jawunany tany mulurru nginingirriyin. Perrngempi warrnykuwa nginimiyinjinte. <sup>2</sup> Nginini ni Ngapuny kulurruku, "Ngapuny, ngayimilij ngenangirriyin wayinikana taapiny wijiwu ngenayin kilirr. Ngenangirriyin wanjina, 'Ngapuny thet junpiyina tam mulakawim purrunpu ngarri Ninipan.' Nguwan. Welanginy wiji ngarri ngenayin kilirr, ngayikul ngenangirriyin, 'Ngapuny nawun menkawiny nu. Kalyekpiny nu.' Wayinikana ngenangirriyin, 'Turi pirriyilipe ningi. Nguwan thet pinpiji.' Ngenangirriyin, 'Piri ngarri pirriyan ningi Ngapuny, tawurayik pinpiji. Nguwan thet pinpiji,' ngenangirriyin. Wayinikana wijiwu ngenayin kilirruku. Ngayikul ngenangirriyin, 'Ngapuny menkawiny nu. Kalyekpiny nu. Tawung penemenji waringarrim. Kunak ngarri pirriwuna ningi, turl ngarri pirriyan ningi, tawurayik pinpiji. Nguwan pinpiji,' ngenangirriyin. Wayinikana wijiwu ngenayin." Jawunany nginini ningi Ngapuny.

<sup>3</sup> Tangempi Jawunany nginini ningi, "Kunung pene ngirri nangkirrim. Miya nang nginpuwun. Turrawu purru miluwaya nginpinkente, nang nguntuwun," nginini ningi Ngapuny ni. <sup>4</sup> Purrungunti Ngapuny nginini ni Jawunany, "Nyingan nguwan wariny numpuniyina. Turra purru wariny ninante?" nginini ni.

<sup>5</sup> Purrungunti Jawunany kilipa nginiyin. Ngarr nginiyin. Ngela nginiyin mayarupiny. Keman juntu penamanji ngarlum nawuyangem. Ruta nginiyin ngarlun. Mamperra ngarri nginiyinte. Tek wanamayinte, kapa Ngapuny nguwin pirri tam perraniyin ngarri Ninipan. <sup>6</sup> Purrungunti Ngapuny rekanya tuluke nginimanji werrkaliny ngirripak ningi ngarlun. Warangkanja nawarrak nginimanji. Werrkale waniyat kanarrany. Menkawim ngarlum tulukpe wumperrayitpe ningi. Perrengempi Jawunany nginingirriyin, "Menkawim perrem ngarlum. Yilkiya kulukulu ngenan purru ngarlum," nginingirriyin.

<sup>7</sup> Purrungunti rangarrwan Ngapuny perra penayitja lukal. Tam janga penangnya karntin yilangpiny. Ngerep penanya kanarrampi. Perrjila wumperrayitpe. <sup>8</sup> Karak parntel pirtij ngarri nyaniyiinya, Ngapuny perra penayitji kernkalim punpum. Ngelmangpiny perra penayitji. Jawunany thuwunke nginimanya. Kirliwirring malalal papij nginiwuranya tumun.

Perrengempi nginini ni Ngapuny, "Kunung pene ngirri nangkirrim. Nang nguntuwun. Turra purru miluwaya nginpinkente," nginini ningi. <sup>9</sup> Perrengempi Ngapuny nginini ningi, "Nyingan nguwan wariny numpuniyina kanarram purruwa. Turra purru wariny ninante purruwa?" nginini ningi. Perrengempi Jawunany nginini ni, "Wentha kapuwa wariny ngarri ngenankente purruwa. Wariny ngenanke nangkirrim," nginini ningi.

<sup>10</sup> Tangempi Ngapuny nginini ningi, "Perrem kanarram warangkanja perrawalk wumperrayitpe muntuyan. Jirrawukuwalun jat perraniyin. Makanngem kirrij nginiyin. Nguwan tuluke junamana. Nguwan nawarrak junamana. Wariny ninante nuwa. Turra purru mulurru nene purru tam kanarram?" <sup>11</sup> Nginini nyaliny ningi, "Kaninya? Nyingan mulurru nene purru kanarramuwany. Ngayan mulurru ngenan purru tam melakawim purrunpu ngarri nawarran mayarun Ninipan. Tam melakawim 120,000 wanyanyakim purrunpu ngarri tiyana, pinariwurrun purru yilkurrum purru menkawim purru. Kaninya tam pulumanam purrunpu ngarri tiyana? Pinariwurrun purru. Jaam mulurru ngenan perrem purru." Ngapuny nginini ningi Jawunany. Warany.